

說
庫

第十三冊

13
錢氏私誌
王文正公錄
江南北別錄
朱學客話

光

年

第十三年

光	緒	三	十
年	十	三	年
十	三	年	十
三	十	年	三
十	三	年	十
三	十	年	三

茅亭客話目錄

卷一

蜀先兆

太平木

甘露

天尊木

虎盜屏跡

蜀無大水

車轍跡

程君友

雍道者

卷二

王客

崔尊師

范處士

李處士

張海上

蘇推官

費尊師夢

馮山人

李四郎

卷三

淘沙子

張道者

大覺禪師

張平雲

王居士

勾居士

味江山人

蘭亭會序

卷四

家居泰

周寫貌

丁元和

王太廟

劉長官

陳損之

史見魂

女先生

李聾僧

勾生

卷五

黎海陽

白蝦蟆

鮮于耆宿

食蝦蟆野菌

虹蜺

雷

雨雹

雉龍

季老

慈母池

龍女堂

卷六

悼蜀詩

艾延作

夷人婦

張光贊

金相輪

金寶化為煙

奢侈不久

劉肝

卷七

哀亡友辭

郝逢傳

陳季和

鬻屨姬

盲女

鐵骨魚

卷八

瑞牡丹

寓孔雀書

滕處士

好畫虎

虎化為僧

葭萌二客

李吹口

卷九

天倉洞

鬻龍骨

試金石

僧繇閣

石像

魚化為石

採枸杞

趙公山

鹿水溪蛇

趙十九

景山人

彈鴛鴦

鬻饅頭

太子太師

卷十

孫處士

黃處士

程先生

杜大夫

任先生

譚居士

小童處士

茅亭客話目錄終

茅亭客話卷一

宋 江夏黃休復集

蜀先兆

聖朝乾德二年。歲在甲子。興師伐蜀。明年春。蜀主出降。二月。除兵部侍郎。參知政事。呂公餘慶知軍府事。以偽皇太子策勲府為理所。先是。蜀主每歲除日。諸宮門各給桃符一對。俾題元亨利貞四字。時偽太子善書札。選本宮策勲府桃符。親自題曰。天垂餘慶。地接長春八字。以為詞翰之美也。至是。呂公名餘慶。太祖皇帝誕聖節號長春。天垂地接。先兆皎然。國之興替。固前定矣。

太平木

偽蜀廣政末。成都人唐李明父失其名。因破一木。中有紫紋隸書太平兩字。時欲進蜀主以為嘉瑞。一有識者解云。不應此時。須至破了方見太平爾。果自聖朝弔伐之後。頻領曠蕩之恩。寬宥傷殘之俗。後仍改太平興國之號。即知識者之言。諒有証矣。

甘露

聖宋戊申歲。帝奉元符。禮行泰岳。是時雨露之恩。徧加率土。應天下悉賜大酺。其年

冬十月。知州樞密直學士任公中正。於衙南樓前。盛張妓樂雜戲。以宴耆老。遵詔旨也。大酺之盛。蜀民雖眉龐齒齟。未曾見之。可謂榮觀爾。歡呼之聲。傾動方隅。皆稱往歲兩陷盜賊。墮於塗炭。豈知今日遇文明主。作太平民。得觀茲盛世矣。是歲冬十二月。甘露降于大聖慈寺。甘露寺。淨眾寺。金繩院。龍興觀。青羊宮。及衙解內道院。凡八處。竹柏之上。自承天節日至二十日。逐夜聯綿不止。葉無大小。悉皆周徧。士庶扶老攜幼。奔馳于路。以盤盂承接。嘗飲之。甘如飴蜜。又里儒証瑞應圖曰。夫甘露之降。王者尊賢尚齒。則竹柏受之。聖人作為道之休明。德動乾坤而感者。謂之瑞。其是之謂乎。

天尊木

大中祥符六年。綿州彰明縣崇仙觀。栢柱上有木紋。如畫天尊狀。毛髮眉目。衣服履舄。纖縷悉備。知州比部外郎劉公宗言。遂繪事奏聞。奉聖旨。令津置赴闕。送玉清昭應宮。其觀主賜紫及茶絹等物。今川民皆圖畫供養之。

虎盜屏跡

聖朝未克蜀前。劔利之間。虎暴尤甚。白衛嶺石筍磯。虎名披鬃子。地號稅人場。縣漢

間白楊林虎名裂蹄子。商旅聚徒而行。屢有遭搏噬者。嘉州牛頸山有子母虎。陵州鐵爐山有青豹子。彭蜀近山鎮縣。暴獸成羣。農家不敢放牧。及出門採樵。行旅共苦之。又有羣盜諸州縣結聚。各有百人至二百人。官軍掩捕。則與格鬪。勝則禦敵。官軍敗則奔入林藪。雖有捕盜之吏。莫能擒獲。僅四十餘年。民無安業。聖朝克復。後歲貢綱運。使命商旅晝夜相繼。廬舍駢接。犬豕縱橫。虎豹羣盜。悉皆屏跡。得非繫國朝之盛衰。時政之能否乎。

蜀無大水

開寶五年。壬申歲秋八月。初成都大雨。岷江暴漲。永康軍大堰將壞。水入府。江知軍薛舍人文寶。與百姓憂惶。但見驚波怒濤。聲如雷吼。高十丈已來。中流有一巨材。隨駭浪而下。近而觀之。乃一大蛇耳。舉頭橫身。截于堰上。至其夜。聞堰上呼噪之聲。列炬縱橫。雖大風暴雨。火影不滅。平旦廣濟王李公祠內。旗幟皆濡濕。堰上唯見一面沙堤堰水入新津江口。時嘉眉州漂溺至甚。而府江不溢。初李冰自秦時代張若為蜀守。實有道之士也。蜀困水難。至于白鼃生蛙。人罹墊溺。且久矣。公以道法役使鬼神。擒捕水怪。因是壅止泛浪。鑿山離堆。闢沫水于南北。為二江灌溉。彭漢蜀之三郡。

沃田億萬頃。仍作三石人以誓江水曰。俾後萬祀。水之盈縮。竭不至足。盛不沒肩。又作石犀五。所以厭水物。於是蜀為陸海。無水潦之虞。萬井富實。功德不泯。至今賴之。咸云理水之功。可與禹偕也。不有是績。民其魚乎。每臨江潁。皆立祠宇焉。

車轍跡

綿州羅江縣羅墳山。有羅墳洞。昔羅真人名墳。修道上昇之所也。其洞凡有水旱疾癘。禱之靈無不應。太平興國五年庚辰歲中秋。彩霧輕烟。月光如晝。香風瑞氣。瀰漫山谷。四遠村民。登層巒而望之。唯聞音樂環珮之聲。遲明。但見車轍之跡。去洞十里餘。濶一丈以來。碾土深三四寸。其轍跡隨山勢高下。直至洞門。迤邐狹小。即不知神仙乘車出洞耶。音樂之聲。晝夜不絕。遂聞諸州縣時殿前承旨兵馬監押知縣事陳覃。縣尉鄒崇讓。尋詣仙洞。觀茲轍跡樂聲。以事奏聞。詔太白九井山虎耳先生李洞賓。賁香於洞前。設醮禮察視之。由以祈靈貺虎耳先生大名府有道之士也。時呼為李八百。云已八百歲。如五十許。童顏鬢髮。行速言徐。每駐足。士民聚觀者如堵。先生即於懷袖中。採取銅錢二三文。撒之。則稍得人退。因是每十步二十步。取錢一撒。至暮懷袖之中。錢無缺焉。翌日與諸官入洞。行十里已來。唯聞異香襲人。樂聲隱隱。人

吏各持香燭屏息捫膝足履嵌崿魂竦汗漉先生步無差跌神氣自若出洞之時衣履之上無泥滓露汚之跡。

程君友

遂州小溪縣石城鎮仙女垭村民程翁名君友家數口墾耕力作常於鄉里傭力織草履自給人質鄙朴而性慈仁行見禽獸常下道迴避不欲驚之寡訥少與人交言年六十許凡見山人道士聚得傭負之直以接奉之凡有行李者即與之負擔無遠近或遺其錢即不顧而迴如此率以為常開寶九年春往雲頂山寺遇一道士古貌神俊布衣麓屨引一黑狗見君友云願與我攜拄杖藥囊到青城山當倍酬爾直君友忻然隨之入一小徑初則田疇荒梗漸見花木與常所歷者路稍異行三四里又見怪石夾道皆生細竹桃花飛泉鳴籟響亮山谷望中有觀宇依山臨水松桂清寂薄霧輕煙披拂左右黑狗前奔道士昇廳君友致藥囊拄杖于階上道士曰爾有仙表得至於此開囊取瓢傾丹一粒令吞之曰若有饑渴則可嚼栢葉栢實此此君友懇祈願住仙齋以効廝役道士曰爾且歸家別止一室精思妙道吾至九月八日當來迎爾君友拜謝未終黑狗起伏因出門避之向來所遇如失寂無影響若夢寐中

逡巡見一負薪者問之云是青城山洞天觀路君友歸家無饑渴之念遂別止一室不顧家事嘗焚栢子栢葉靜坐無所營為不飲不食時嚼栢實三五顆而已門外有一栢樹下有一大盤石常織草屨及偃息于上至九月七日夜山谷月皎風清君友於居前後如有所待達旦雲霞相映有如五色君友仰觀躡空祥風忽生彩霧鬱起妻孥悲號遂越巨壑層巒涕泗追望極目而沒鄉里皆見聞時知州右補闕李公隼通判張公蔚以為妖訛囚繫君友妻男子獄遣吏民於遠近尋其踪由時村耆鄉里不堪其擾眾焚香告曰君若得道却乞下降勿使鄉人濫獲其罪忽一日君友在州衙門請見通判張公怒而詈之曰若仙當往矣豈得復還顯是妖也將加責辱令拘之君友但俛首默坐唯不飲食吏人有私問之曰何以得免對曰新主將立何患乎不免言辭安詳人皆不論至十二月初值太宗皇帝登極遇赦至是方悟新主之驗也君友歸家入諸舊室有真仙時降輝光燭空升牀連榻笑語通宵妻男聽之皆不可曉至太平興國元年三月三日於栢樹下石上復騰空冉冉而去妻男望之已在霄漢唯聞音樂及香風終日不止本州以事奏聞恩賜其妻男粟帛時鞠獄吏張漢瑒觀其事蹟因是棄妻子遊歷名山至今尚在

雍道者

雍道者名法志。東川飛鳥縣元和鄉人也。人雖鄙朴而性慕清虛。常供養一石老君。及誦天蓬咒。枕中經。因夢一道士云。雍法志。吾於汝處求錢三千貫。文法志辭貧。道士取石像前。掃帚云。但有患者。將此帚掃之。即愈。言訖而覺。因是鄉里有患者。將帚掃之。應手立愈。里人相傳。求醫者填委。時郡城西南青羊宮。即老君降生之所。咸平中。兵火蕩焚。唯降生元陽二臺存焉。遺址荒地。鞠為茂草。已酉歲。知州密直學士任公。請重興舊址。其殿東。每夜聞鐘聲。不知所因。鑿池。獲一銅鐘。扣之響。三十餘里。士庶游觀。經春及夏。法志於宮門。見一小兒。偃偻而行。以糲帚掃之。正腰而去。聚觀者架肩接踵。禮法志為神仙。時起宮工匠輩。有腰脚手臂痛者。掃之皆愈。因是四遠傳云。雍道者。掃盲者能視。跛者能履。患者雲集。有賞金守門。經旬未獲掃者。所得錢帛。並送修造所。逾百日。因悅一婦人。潛出不歸。患人稍稍不集。至是年冬。再來掃病。無應。自慚而遁。因詰其修造掌籍者。錢僅三千餘貫。正符夢中之數爾。

茅亭客話卷一終

茅亭客話卷二

王客

王客者。失其名及鄉里。常攜筇挈籃。引一斑犬。往來邛焚間。以採藥為事。多止於荒廟廢寺中。雖雪霜風雨。亦無所避。優遊市肆。人或問修養之道。即默而不對。好事者多飲之以酒。積數年。形貌服飾。未嘗更易。天禧戊午歲春。自言遊青城山。迴時臨邛宰師仲冉頗好道藝。思見其人。即令召之與語。且曰。飲酒否。對曰。某有少藥。君能服之。某亦飲酒。師侯受藥。各飲數盃。款話移時。云。吾儕野人。心近雲鶴。久居城市。頗思歸鄉。誠有奉託。辭出往故驛路去。師侯餌藥。漸覺輕安。專令人訪之。至四月二十七日。獨攜杖負笈。往臨溪路一里間。有寺曰國寧。遂於寺門下坐。行人問之曰。日將暮矣。於此久坐何為。答曰。我有師在此。至暝忽暴卒于門下。鄉耆聞官。權瘞于道左。至六月。師侯聞之曰。曩所言久別家山。頗思歸鄉。斯之謂乎。遣吏趙秀往彼焚之。發其尸。顏貌如生。手足皆軟。若熟寐焉。頃之身下清泉湧出。浮屍而起。遂就沐浴之。鄉村聚觀。或以衣服斂之。兼及設酒饌而祭者。師侯曰。吾聞仙人不死。脫有死者。乃尸解也。此人真解化乎。身雖委蛻。神未遐逝。自輟俸以瘞之。且旌異人也。前所言有師在

此其是之謂乎。休復常讀登真隱訣。謂仙道有昇天躡雲者。遊行五岳者。服餌不死者。尸解而仙者。忽有躡遊太陰。自有太一守尸。三魂營骨。七魄衛肉。胎靈錄氣。雖以鐵石牢固藏閉。終至煉形數滿。當自擘石飛空。而仙者。夫得道之士。水火不爍。入水不濡。躡空如履實。觸實如蹈虛。雖九地之厚。巨海之廣。八極之遠。萬方之大。應倏歟。而至何所拘滯耶。所以然者。形與道合。道無不在。毫芒之細。萬物之衆。道皆有之。今備錄者。與王客張本也。

崔尊師

崔尊師名。無數。王氏據蜀。由江吳而來。託以聾瞶。誠有道之士也。每觀人書字。而知其休咎。能察隱伏。逃亡。山藏地秘。生期死限。千里之外。骨肉安否。未嘗遺策。時朝賢士庶。奉之如神明。龍興觀道士。唐洞卿令童子以器盛蘿蔔。送杜天師光庭。值崔在院門坐。遂乞射覆。崔令童子於地上劃一箇字。童子劃一此字。崔曰。蘿蔔爾。童子送迴。拾一片損梳。置於器中。再乞射覆。崔曰。劃字於地。童子指前來此事。崔曰。梳爾。洞卿怪童子來遲。童子具以崔射覆為對。洞卿久知崔有道。令童子握空拳。再指此字。崔曰。空拳爾。洞卿親詣。崔曰。一字而射覆者。三皆不同。非有道詎能及此。崔曰。皆是。

童子先言。非老夫能知爾。此字象蘿蔔。亦象梳。亦象空拳。何有道耶。崔相字託意指事。皆如此類。王先主自天復甲子歲封蜀王伯。盛之後展拓子城西南。收玉局化。起五鳳樓。開五門。雉堞巍峩。飾以金碧。窮極瑰麗。輝煥通衢。署曰得賢樓。為當代之盛。玉局化尊像並遷就龍興觀。以其基址立殿宇。廣庫藏。時杜天師詣崔曰。今主上遷移仙化。其有証應乎。崔嘆息良久。言曰。皇嗣作難。爾甲戌歲果偽皇太子元膺叛。尋伏誅。後杜天師謂崔曰。有道之士。先識未能。崔曰。動局子亂。必然之事。何有道先識者哉。杜天師曰。此化畢竟若何。崔曰。局必須復。非王氏不可也。先主殂。少主嗣位。明年再起仙化。以為王氏復局之驗也。聖宋大中祥符甲寅歲。知州諫大夫浚公策奏。乞移王先主祠。取其材植。以修此化。土木極備。樓殿壯麗。工木未畢。或於玉局洞中出五色雲。觀者千餘人。移時而散。尋畫圖呈進。降詔獎諭。即崔所言王氏復局之事。証應何其遠哉。休復嘗讀仙傳拾遺云。二十四化各有一大洞。或深廣千里五百里。其中有日月飛精。謂之伏晨之根。下照洞口。與人間無異。有仙王仙官卿相輔佐。如世之職司。凡得道之人。積功遷神。返生者皆居其中。以為民度。每年三元八節。諸天上真。下降洞中。以觀其理善惡。人世生死興廢水旱風雨。皆預關於洞府。及龍神祠。